



KOTAVUSA VIRDA

KOTAVAFI VIRDA VESTASA VA TAMAVA IS ARAYEEM MU AYIKEEM

Kotava, tela tamefa golerava
Va ina kosmac !!

Pereaksat ke 2025
33^e otuk




SARA SERSYA

ALWETT
MORETTI
BOCCATO

SARA Sersya

1 - Ta kono duzxo



soleik
Blackberry

SARA Sersya

1 Ta kono duzxo

Sara sersya 1. Ta kono duzxo

Englavafa xantofa wimbura.

Princess Sara (1981)

Sutesik : **Audrey Alwett**

Zovdasik : **Nora Moretti**

Ksevasik : **Claudia Boccato**


Piskusik : **Éditions Soleil / Blackberry**

Kalkotavaks :

Sara sersya, Ta kono duzxo

Kalkotavara : **Elisabeth Rovall (2025)**

Sanegara bad 2 otuk ke virda. Taneaf lik koe bat 33^e otuk, azu toleaf koe ban 34^e otuk.



Krentasik : Audrey Alwett

Zovdasik : Nora Moretti

Ksevasik : Claudia Boccato

SARA SERSYA

FENTUGAL KE LONDON TIR FIGAF TOVE NUDARUMEIK-
VIELE FENTUNAF A BRA VA WIDAVA LICTAR, PUNE
TIRA KE KELMUNIKAF A STABA TIR LOKIEWAF A.

DONG DONG
DONG DONG
DONG DONG




CRITIC
CROUIC

DISUKEC !!
BATLIZU LO-
KIEWON WIT !

SARA CREWE
TIYIR
FALACKAF A.

OOOX,
IN TIR
LISTAAAF !



GUUE, EPUCKUYUN, VOXEN
VA BERGO KUM BRUNTOL
ROTIR CO LOPLEKUL ?


VOXEN WELTIKYE, BRUNTOL...
TCAX, RINAF A NAZBEIKYA TIR
JOTARSAF A TA MANA TAPEGA !




MANGIC !! ME-
KANE WÍ, JIN !





ENWE, GADYE- ISEN
VA KONAKA MYOT-
LIOZA IXAM DIGÍ !

VA RIWE JINAF EPUKSEEM
PU SIN AL DOLÉ ! BATA
JOTIKYA APE TIR DIVEF
SERSIK, EDEME MEROTISA !











VA BATYONA BRAGODA DISUKEL, EKE SINA STUTENYED ! ROTIR TANA TIR EMILY ?



LUXE BANA ? LANÉ DA PUDA KE EMILY VAS BATCOBA VEKTACKAR.



KIAVÁ. KAS VA WIN ROPOMÁ ?

VA BLISA BRAGODA ANEYAV.



BATTODE KOE XOCKO TIGIC !

JINAFÁ NAZBEIKYA VA LANA PILKOVAFÁ BRAGODA TO DJUKEVLANIR. SARA, DIVELE !!







VA BLISA BRAGODA YOLTKI-RAFA GU EMILY ANEYÁ VOXEN FISTE INA VA JIN NUGILDATAR.

KIREN ZVAK KE BLISA BRAGODA TIR DA CWE INA VA KALIRA TO MEVIELE GILDER.

UX... KAS VA STUTESA BRAGODA OKU DINGELTUSA LODAMON ME JUGEMEL ?

VOLGUE. ASKIRA OK MEASKIRA KE EMILY TIR MEZOLONAFA. EMILY DYE GOTIR INT.









WARE ERULT ?! VOXEN TERE,
BATCOBA EN TIR VERTOVAF !


OX MINCHIN WELTIKYA, VA BATCOBA
WIL ! VA KONAK BILOXA AL IXAM
BASCEKA. KOTLIZE BRANIOLXA TIR !

JACK,
POMAL !!
WILUON !!



ISEN BATLIZ DISUKEL !!
TO AGELTUCAF VALEN-
CIENNES TALGUKAY TIR !

AMELIA, GUAULAL. EN MECTEL !
BATCOBA TIR ROTAFU
GU RINAF FREZ.



BATABLAM

VOXEN SOPRON,
VA MAN VAGETUM,
KAS CUGUNAYKON
ME KRUPTEL ?

BATCOBA TO LOEKE KIPEAFA
MU LIJOTAF RUMEIK. BATA
VELIKYA DUM SERSIKYAMA
ZO KELMUR.






SOE, BATCOBA VA KESKANYA
NEKITIR VIELE VA VAYAS-
IKEEM KO UJA STATAT.
MOE TANEFA EMA
VA INA RUNDATAT.




DUMEDE KONA KLAIKYA
VA MANCOBA CO OLEGAR.
NOPE MANA ODERA, INA
APE TIR RINTAPASAFU.

TO WARE KONA JOTIKYA
VA OLGAFU BLIRA KEV MIN
FU ASKIR, JIN KALI !





ME ROKALÍ DA BAT LIPOK
VA JIN PUVER· VOXEN
GESTÍ DA SAYAKIK
VA KOGEJARA DERE
ME ALBAR·




CLANG
CLANG

CREWE WELTIKYE, RIN BATLIZ !
VA EMUDERA VA RIN
IS NAZBEIKYA AMPUPUYUV !



TÍ AMELIA, I MIVASKAF
TCICESIK VA MINCHIN
WELTIKYA·

VA JIN RADIMELANIC, VAY !! INA
VA MIN KO BONTAY FU KEVLANIR·



DO BALKAFI ZVERI
RINON FIRVIYINI,
PU SINT JONTIK-
VIELE SUTETET·
TO LUMISARAMA
ICLE TIR·

OX SARA ! TIL
CUGEKE EKEMAFÁ !
TOKCOBA VOLDO
JINAFÁ EYIKYAMA
FU VANPÍ ?



CREWE WELTIKYE,
ZO FELBÉ DA VA RIN
TERE KAKEVÉ·
VA MANA LISTAFA
NAZBEIKYA DIKIL !





ME TÍ LISTAF·
TOKDUME IN
VA BETCOBA KALIR ?


EDE CO KALÍ DA INA TIR
LISTAFA, PUNE CO FITULÚ
ISE CO GRUPÉ·




STRAGACKAL,
VA INAFÁ GAARA ME DWÍ·
INA VA NEVA GIBEBELIR !

EMUDERA IS GAARA
VA VAYAPAS VELIK
TITIR GOGOLAP·





BAT VELIK GILTIR DA KOTTAN
KABDUEON ALTOSOAR. VA IN
FU GOVIKLUT ISEN BATCOBA
ME TITIR ARIENTAMA.




ABIGABA. INA KOE MAWA
VA INT AL BUDER.
VA MEK LOR GILDET.

KIEWAXE ! ZO GIBLOKARSAR
NUMEN TRAKUYÜ DA VA KOTCOBA
KOE MONA FU SONUYUR.




DYE KRE, VERE FU TOZUT. VA IN
ANEYAL !! VA VERTEEM KE KIZEY
PU IN FU DIVÉ.



AE WELTIKYA, VOXEN
EDE CO VOL DJUPIR ?


CO VEWAR ? AX, VA
MANA BAGERA CO
EBLER, VA MANCOBA
CO DJUWÍ !



SARA
WELTOCIKYA ?

TONK
TONK

AL TSELKÁ. ABICEDJE
CO DJUZAUZÁ ANTAF, EDE
BATCOBA VA WIN ME KOSTRUR.



AE EFE, VOXEN
TO... MINCHIN
WELTIKYA
VA RIN KO
INTAFO BAZAXO
CO DJUWIR.

ENWE, INYA TIR DUM
INTAF KIZEY. FENTAF IS
PORAF IS EVAKAF.

ABEGAF VELIKYA, LONDON
TIR AMIDAPAF GU KOTCOBA
RINON GRUPEYENA KOE BARATA.

GOGILDAL.

BATLIZE, VA ZANISIK
RWAVETES VA RINYONA
KIPFAFA RINTA ME DADITIL...

LORIKAP !
TOKCOBA
WARE DILIZER ?!

PARÁ, MINCHIN
WELTIKYA, VA
ERULTAP MU
WELTOCIKYA
CREWE SU MBI
BILDET, VOXEN
TUVEL TIR
PINARSAF !

Tó
Tó



VA YAL ?
MU JIN ?


CWE VA TISA COBA
GRUPÉ ! VA WELOR
KE CINAFE IAXE
KAGRUPÉ !


TO TEZA ZOVDAYANA
DO GADYE TIR. VOXEN
MBI KALIVÍ DA CO TIR
ESARSABA GU IARA !

EX KLE, VELYA
KALION FENKUL !!
WICKIL DA BATCOBA
VA VOLVURA NEKIR.

SARA SERSYA







GIL, RINAFE GADIKYE VA FRANCAVUS
MIVASKIK PU RIN FIRVIYIR.
MALTRAKÚ DA KRALIPİR
DA VA BANA AVA DI RAVEL.

ENWE, FOLÍ DA...
BATINDE TEGISON
VA JIN FOPUVEGAYAR.

ISON LANINDE GITRAKUR
DA RINAFE PUVE TIR
TANEFA COBA ? Wİ.

VOXEN SEDME JINAF TRAKU-
RAY, RINAFE GADIKYE KURANİR
DA VA FRANCAVA DI RAVEL.

EX UX... LANINDE VA INA
ME RAVEYÉ, VOXEN...

NUTIL MEVALEAFA, PINAFA SARA-
TAVESİK FU ARTLANİR.
POKOLÉ DA DI ASKIFOAL.


NON !! LARDE ME
RAVEYEL, PUNE KAN
BATA NEVA VERE
TOZ ASKIL !!

EFE,
VOXEN...

ME « VOXEN »
ROTIS, BELİL !!



MAN KIMTIK, IN
DERE TIR VODISKAF !







SAINT-JOHN WELTOCIKYA, RONTON
DEBANYEL ISE VA BATA VINOTCA
DIV ART DESWAL !! RINAF BASK
TID MAYAKAF !









Kiavá,
Kiavá !

OX CWE,
VA WARZAF
TAVEMBIK PATAT.



SARA SERSYA







OX, POKOLEYÉ DA
VA INA ZEKASA
ROTIR CO WIT !

WAUX ! BLISA BRA-
GODA ! VA TOKCOBA
INA GRUPASKIR ?


VA MECOBA ! VOXEN
LANÉ DA BLICKIR-
VA INAF ITEEM WIL ?

VA INA
ARINTON
TRASİYİ,
LUSTERUSON
DO...

...GADYE.




SARA ? NOPE
KONI ALTOKI
ROTEL ?



GUE, VOXEN
VOLS ALTOKI.

KAS VA INTAFE
GADIKYE LODAM
BETTEL RENAL ?

JINAFE GADIKYE ?
VA JIN
VUDESIRSIR !
DUN KALIR DA
TÍ AKOYDAF
JAFTOLOCAP !






ENWE, JIN... VA INE
RIWE MEVIELE Wİ-
INE GIBEKOBAR.

JIN, VA INTAFE GADIKYE SANON
LOON DAM BETTAN. BATDUME ROTÉ
KIREN INE AL MALLAPIR.







VOXEN PU INE AL ABDIPLEKÜ
DA TITİ TAKRELAF
ISE KOTKASE ACAGITİ !






20







Geja ke IV gindik

KOE ROMA BAK 68 RGJ-, GALBA VA NERO
VETROVGAR AZE WETCE GINDIK ZO ETIMAR...


KRENTARA : Yves DUVAL
ZOVDARA : Christian DENAYER




ETIMAYANON GU
GINDIK BA 15/01/69,
OTHO MOE KELDA
GU TSUNERAPA FURE
ZO RALENTAR.

ACUM SENATUS
MAGA VA MILK TA
VANMECOBARA VA
JINAF STAKSER...

MEINDE KIVAL !!
VA IN ACON KET !



TIRE, KIPI KE ERVOLIA KE OTHO KEV TELA
KE VITELLIUS ZO VODJUYUR.



NIKYE, MELD RE FURE
DILIZER. JINAFI ZOLONAFI
FLI JUPAR DA GU DOALIERA
VA INT GOMEKONEDI !



NUME DO ILKAF
SUESIKTUM VA WIN
BATLIZE KETÉ !

VALENS IS JIN VA RIN
ICDE TENULE KE LYUMARA
GIVATAV !



PISONASA KEVLANIRA TO KOE BEDRIACUM KOE
VOMALPAFA GALLIA DILIZEVER. JOKE ERVOLIA
KE VITELLIUS KALION TENULER.



OTHO ! MILK
ZO SURTER...
GOYATEL !

TOKENIDE ? KOT-
COBA ZO TAZDAR !



MILEDJE, ARTE BANLIZU KONAKE DECITMETRE....

EDE VITELLIUS
KURANIR, PUNE
ROTIKELDA RE ZO
FENKUR !




... ISEN TUFA TO
MU MIN DI ZO
RAVALDAR !



OVEC. VA SENATUS
MAGA TAFUT ISE VAN
ROMA AVLAT !!



KRAFOLMA KE ROMA



BA 01/07/69 KOE ALEX-ANDREIA, ERVOLIA VA VESPASIANUS WETCE GINDIK KIAVAR AZE VRUZAR.

KO ROMA !!

KO ROMA !!

KO ROMA !!
KO ROMA !!

VESPASIANUS MELDMELDON KAL TUVEL KE ROMA ARTLAKIR.

SABINUS BERIKYE KE VESPASIANUS BATLIZE TIGIR, BURESON VA STAKSA !

GADIKYE VA XOMERACKA PU RIN DRAGER. KO CAMPANIA BULUTUL !

NALÉ, KALNALÉ, VA BATCOBA LODAM XONUKERA !

VOXEN SANELIJA KE ROMA ME KURANIYIR DA BATE UDUTIKYE LIWAVDON DI ROBULUYUR.

XONUKER !!

ME ISKEC DA IN ROYATER !!

VITELLIUS DO BEGIASIK IS BURMOTASIK REMO BIRGAF TUVEL KE INTAFA BERMA LAYATER !

... VIELE LAIZON...

LANIC... VA WIN KEVLANITI ! KO BERMA GODIMLANI... VA ROGA AL VULKU !

WILUON ASKI... TCAX, AMLITAL, SULEMAJ !!


RELMEON GAN VAKOLIE KE INTAF VAKOL, VITELLIUS VERE ZO SOPER...

SAAC !!
SAAC !!

ROMA VA LOPROYAF GINDIK FU GRUPEYER, I VA GINDIK GIBEDEKTUDAS VA TRIGUCA IS GIJUCA KE SOKA.



TENA



DARWIN



Darwin

Francavafa xantofa wimbra.
Darwin (2020, 2 dov)
Sutesik is nios : **Christian Clot**
Zovdasik : **Fabio Bono**
Ksevasik : **Dimitri Fogolin**
Piskusik : **Glénat / Fayard**

Kalkotavaks :
Darwin
Kalkotavara : **Pierre Van Moorgen** (2025)

Sanegara bad 6 otuk ke virda.
Toza koe 31^e otuk, toleaf dov
mali 34^e otuk



ARTI KONAK
AKSAT.



TOKCOBA TIR,
DARWIN WELTIKYE ?

JINYON SPERT KE DAREF
AKSATTUM. VA SIN PU KONA
TOTA VAN ENGLA DJUPROBILDE
VIELU VA TANA GAMDATAT.



MU BELL TAVESIK ISU
MALTHUS ISU OWEN...
MANA RADJACA ! KAS
EN FOLIL DA RINAF
KOBARAMA VA BATYON
TCUMPAF GRUPEIK
FU DULAPAD ?

KOTTODE
SIN TITID
LOKIEWON
MALYES
VA DULAP.



WETCE TUWAVOPIK KE BATA
TOTA, VA BATCOBA BIU : VEWÁ
DA MAZUKESON VA BATYON
KORIK GU RINYON PUNAF
DOTAY CO TUKIPEAWET.


TRAKÚ DA LEVE
RINAF DIRGARA
ME TÍ, McCORMICK.




TO BAPLA TIR,
DARWIN WELTIKYE.

ENWE ? RABATÉ DA ARDIL
WAN TIR DIVEACA SEDME
RIN. ARBE JINAF FINERA,
RINAF YULT VA TOTA
ME BULUTUD.

TIL FISTUKAF. MIV
REDAKIK DRAGEYER
DA VA YULT STAKSETÉ.
NUMEN VA BATCOBA
DIMNARIL !! VA TELA
ASKIRA ME CO GRUPEL.







BATCOBA
EN TIR SUTKAFA.
TOKCOBA TIR ?

WARKUNDOL ! VOX
ANTON TOZA. VA
GRIVUTERA VA
NAMULOLCOT KEL !!
TO ENKIEWAFA !



DARWIN SU KALIR DA TIR
DONAF OKOLUSIK NUMEN
GAUCHO AYIK VA VULTERA
KOMOLATASON DRAGER.



VOXEN... GAUCHO OKOL
EN TIR EC DAM ENGLAFA
VIKLURA.



GUE. VOXEN
IN ME GRUPER.





NEKEN VA BATA KOTCOBA
BATLIZE AL TRASIL ?
VA JINAFATOTA
GU BATCOBA ME
FU TERVAL, MEX ?
ANTON NISKAKI TID.



TO SERI KE NISKA ENWE TID. ME TÍ
APTACIK VOXEN MEKI NUTIR KE KONA
NOELFA KATCA. TULON, BATA NISKA
IS BATE ORIA TID PWERTARSAFA.

VOXEN BATTODE, NUTIR LONA KE WARKUNDOL,
VOX JONSANAF OK JONTOLSANAF DAM DUNOL
RE GRUPEN. RIETARA VA STAKSERA VA BATYON
STOGOYEKS PU RICHARD OWEN *
VA JIN PUEBUPESIR.



KAS TELA ESTURA
CO TIR, REDAKIK ?



SOE VA ORIA KE MEGATHERIUM
DUNOL AL PILKOMODÁ, I KE DUNOL
PIMTAYAN GAN CUVIER.
GRIAWIYISA KATCA. VOXEN
ARCOBA LODIVULAF TIR.

EN ?



GUE : NISKEEM GU
KULDOY ZO AOTCEYER.
BIRAF KATCA
AOTCEYENA GU GRI-
AWIYISA SIDAYAF
KATCA, TO GEVASA !



VOXISEN, TOKDUME
BAT GULAF DUNOL
MEA KRULDED ?

BATA DULZERA ICLE TIR FAKAFA,
CHARLES. SIN TIYID
PWERTARSAF TA TOTUK KE
NOAH BAK ANA KENTA. MILA
KENTA VA RINYONA NISKA
ISU KULDOY ROTIR AOTCEYER.



CWE... BATCOBA
TIR ROTISA,
TIRE.

VOXEN... TOKDUME LANA
KATCA CO ZO REDUYUD
AZE CO ZO GRIAWISIYID ?




MEFAVLAF BIBERA, CHARLES. TO
INAF KURANIRA. VOXEN KAXAÁ, VA
BATYONA NISKA GOMALBURET. SINA
TID VRUTAKS KE BAN LEKEUGAL.



SOE KALION TEGIL !!
VA EKASTA KADIMION
DJUMADÁ. BIRAF GROPA
VAN TIERRA DE FUEGO TID
ZEITAF. DJUMIPAVANTÁ
NUMAZE VA ALKAVUIDAXE
INKETÉ.

* GODEVRİK KE CUVIER. WETCE SERIOPIK IS APTACIK
ICDE DOLUNESA GABEROPA, TIR TANEIK PIMTAYAS VA DINOSAURIA DUNOL.

DARWIN





WARKUNDOL...
WARKUNDOL...
AL KADAR.

DARWIN WELTIKYE.
KOTCOBA TICKIR.
TICKIR. GRIVUDEL !!

WARKUNDOL,
IN... VOXEN...
JIN...
GIDLEY ?



XABE. SU SETREL
KIRE VOZEL.
VOLTO TANEATOMON.



VOLGUE, AL WICKÍ... WARKUNDOL
KADAYAR. TUGRANAWEYER. KADAYAR
TON... TON... EC SULEM !

VOLGUE, DARWIN WELTIKYE. KON
SULEM SOMEKADAR EC. GRUPECKEL.
RINAFI SETRA VA WARKUNDOL
TUGIJAYAR, TO ARELDON.



SETRA... NEK
LOEKE GELTRAFA...
ME TIR TANEFAFA,
KALIL ?

MALI LOON PERKA VOZEPOL.
DUM MOI BRASILA.
TÍ VALEAF KIRE WÍ
DA LOKIEWON VIL.



CHARLES ! TÍ KALAPAF
WISON DA RANYEL.
VA CIN BATTOMON
EN VUDESİYİL.



DERE TÍ KALAF,
ROBERT.
TOKLIZE TIGIT ?



KENO TIERRA DE FUEGO
TIGIT, CHARLES. KOE
BEAGLE VEDİL, JINON
VOLTAYAN WETİ TOLDA.



BA 17-e KE
SANTOLEAKSAT
KE 1832.




DARWIN



* VANLANIC, ME VUDEC !! TIV EL'EPARU IS O'RUN-DEL'LICO.
(YOLTACK KE JEMMY BUTTON IS YORK MINSTER)

** « PU JIN ZILIC !! »



LORIK ! VOXEN
INYA, INA...



YALAK YALAK !!



PARÁ,
SIN ME GRUPED,
VA KOTCOBA
GORAVED.

RIIIAH



VA BATCOBA
ME ZINULAYÁ,
GODOSTÉ.

KAS LANEL
DA DI
DJUZAVZAGÍ ?

CO NARÚ
KASE CO
DJUKUREBGAL,
MATTHEWS.

VOLGUE. BAT TISIK
TID REDUNIK
KE LORIK. VA LORAFÁ
DRAGA TA WARÁ
VA GLOGA ZO
GOKAZAWAD.

JEMMY IS YORK IS
FUEGIA, VA BANO
ALKAVUIDAXO
FU INKET !!



ARTI VIETUM,
WELTIKYE.

MALI TOLDA KLOKÁ :
KRISTEVAF SELTAY
VA BATA GOVITAFÁ
TAMAVOTSA FU KOAFIR.



TCAX ROBERT, BAT IRUBASIK
KE TIERRA DE FUEGO RINGON
TID VEY GOVITOL LOON DAM AYIK
SOTIR POKEF GU BONOL.
KAS DYE TID AYIK ?




Caroline abegafa berya, va baroy nik ke Tierra de Fuego gu bali su jovev. Weti tanda al mallapiv. Isen kotcoba al romplekwer. Batvielu kottode, va tamava milinde mea rodusuketé. Kire pu ant rin rovekali : re iltrakú.



Min kotote tid redunik ke Lorik. Voxen battode tokdume in va seltaykiraf englik vox bonaf amerindiik remblis koe meluvadafa tamava al redur ? Tokenide va granafa warkundolinda is milapaf warkundol reduyur aze va bana deokayar ?



Tokenide batmana remblisa gejawal tisik soe inon reduyun ? Re yolká. Kire mea vangrupé...



Tokdume jin, ton awalkolikack, va batmana relkafa trakura inton ruzadesa roteksudá ? Bliké da wana ke koyara va bata iltrakura solimpatar. Inafa betafa guzekara zo beomar.



Kiren ale va afaluca ke Lorik re dile toz nué !



VARGI




DARWIN (1809-1882)

Disukera ke jotaf tandatum ke **Charles Darwin** kareizuna koe bata wimbura, zobena gu suteks ke miv Darwin is inyon pokeik, is geltrevafa icde bifa is tegi, soe zavzar sutesikafa disukera. To konak stravok gruyen icde bat tandatum wiyis va jotaf Charles riwe xuye mallapis ta anamolapira va tamava remi konaka tanda tid. Loon grupeteson, va dragen vebas nevatum meklabuson rupel.

Izvafi vargi gan Christian Clot

TEL LOGRUPEN KORIK KE IZVA

Charles Darwin ape tir logrupen tuwavopik voxisu rotir ayik ke izva. Voxise tel loon vayan isu kevudan. Inafa eva icde katceem nope tuwavafa rebara va data atatcera nekiyir ise gan lanyona alkeva wan zo kevsuter. Voxen inafa eva va korik izgayar. Icde in, va yon delt ke inafa bliratenan nelkon grupet, i va delt lizu va soyutackafa gexata biwe tukolukana gan abrotcaf batakaf lukast kosmat. To ewava ke utcoraf trakusik tir, vol tcazedasa va merofolina blira ke battel artowarotayas va opa is grupereem icde bliind.



Tan rief delt va jotaf Charles Darwin, i lavatrutca ke George Richmond tici 1830-e sanda, radimi koyara ke Beagle tota.

Charles Darwin : jotugal

Charles Darwin ba 12/02/1809 koe Shrewsbury (Shropshire utca, Engla) kobliir, vey Robert Waring Darwin tu sposaf selaropik is Susannah Darwin-Wedgwood kurenik. Darwin « staba » tir ke satcikeem ke widava mali konaka oxila. Erasmus gadikyafe veygadikye (1731-1802) tiyir kotgrupaf aneyasik sutesyes va konaka neva, don « Zoonomia » ixam laninde rueyesa va straga icde towara.

Yasa ke gadikya, i Wedgwood, jontikedje tisa pokefa gu Darwin, dere tiyir dugafa. Josiah veygadikye tiyir redusik va Wedgwood gedelafa rigelaxa sistu noelon ware kruldesu. Josiah II nazbeikye, i berik ke Susannah num ziavik ke Charles Darwin, va inu wan tutrigayar. Toloya yasa sinton paskalepeyed, ton tulon konaka sintafa kurera. Va mila gaderopafa rieta walziliyid, tison neyafa gu *Whig* zabduso is ayikfamevafo pako wasteso va lana miltuca is tunera va levetiruca is pockafa puloda lodam gazabolk is kevuso va *Tory* viderevafo pako.

Remi rumeugal koe nuyotaf rieteem batinde zo kolavayar, dene igeltafa yasa nume rofirvisa va lokiewafa bema. Voxen igeltuca va volkaluca me taruter. Gadikya ke Charles bak 1817 abdievlon mulufter ugale in oxam tir anyustdaf. Gadikye tir rubafe is disafe ise va Charles is aluboy berik di gaar. Loklaaf Caroline Sarah (1800-1888) titir « teca gadikyama » mu Charles is Erasmus Alway (1804-1881) titis lidaf nyapesik is gogolon skedatas.

Velugal ke Charles koe Mount yasaxo koe Shrewsbury is Maer Hall (Staffordshire utca)

sokexo ke Josiah Wedgwood ziavikye dilizer, banlize velikye va tilderugal belon gitiskir. Darwin va intaf rumeugal gu « webdura » duvur. Diveon djukarasokeyer ise kipeyer ise dun kotcomeyer. Koe iltaalxo dile furemkayar isen inafa otcesa vultesa kaliuca tod olegara gan palikeem zo grupeyer.

In anyustdaf den bema ke George Augustus Case koe Shrewsbury zo stakser abdida arti tanda koe mila wida vanpir jandenik ke Samuel Butler tavesik tu tujradik ke Lichfield tis kotgrupaf gertik is vartaf sutesik.

Welidayason tir mialukaf ok dace rotakaf tavembik. Wori va skeurapa va dotay ixam voner. Va ruxa is beza is piuteriok, va kotcoba dotayer, kan geltraf dizves butc is cobekucapa. Va dere djukabelipir ise va lexu terektapar. Voxe va medulapena uga iskedackar.

Mali selaropa kali alkopa

Yasafa prostewa tir dem selaropik. Veygadikye az gadikye tid isen Erasmus Alway berikye va selaropa silukon vayar. Numen Charles mo bata kelda tuwavon zo vodjur. Bak 1825 ko Edinburgh ta egasa doca ke selaropaf vayarugal gan gadikye zo stakser. Voxe Charles va tavera gu argapa torigir voxise gan wira va fortey kostrunon zo vuiler. Va ligabesa fruga rotapon tcizar nume vol tcoker. Va bancoba xuton gu tuwavopafa kobara kaikion batceter. Tavera vaxe konaka dum sulemopa me sked voxen in va gestara koe tuwava albapar ise ton abrotcifa gozara dem eyelt bene ge, va tilderugal impavantar. Va kotcoba firvina gan tuwava dulaper ise loloon opon dizver. Va tcabanera una koe Maer Hall dere sonter. Va int dun funter enide di vanpir viltasikany, koe dace intafa kotlafa mawa, numen va kot fenkus viel ke muvugalafa tcabanera meviele bulfer.



Taneaf grupen delt va Darwin tis tevda do Catherine berikya, skuyun bak 1815 gan Ellen Sharples lingesikya.

Larde selaropafa vayara tir egale, pune arti tolda jovler, dotrakambon gan gadikye. Bantel dwir da nazbeik di vanpir kliwik blidas va yasafi turwi. Lanviele kalir : « Va tcabanera is vakol is gralomera va tovol anton viusul : va intafa volkalu is tela ke yasa anton askitir. »

Batdume gadikye buiver da in di vanpir tawadayaf gertik ke anglikaneva, i ritovaf play mu albasik va tuwava dum Charles. Lo ruxopik ke bane sare bam tiyid gertik. Charles tir kristevaf vols pukfamaf ise va rusunafa ageltuca ke *biblia* neva en folir. Acum joya nutir rietavafa mu in numen yik mali 1828 dene *Christ College kotla* ke Cambridge gin vayar enide va fuxara radimion di tiyar.

Ware kevuson va tazukafa tavera, banlize dere trasir da tavera tid argasa nume me tir lokiewaf vayasik koe Cambrige lodam koe abdion Edinburgh. Va pula jontikviele iskedar, i va pilkovon sidopa ke Adam Sedgwick gertik (1785-1873) tu soe tan redusik va witafa sidopa. Va jontika tavera gu mefakaca torigir nume ta okolvultera ik vefara tiskipir. Wori va John Stevens Henslow (1795-1861) kakever. Henslow va bliopa taver ise va griva ke Darwin icde tuwavopa is dotayera pakar. I jotaf vox ixam vartaf tavesik is vayasik kalion fu tunawed. Darwin va abrotcifa gestara safteon grustana gan tavesik do inaf vayasiktum tiaskon paker voxise do in jontikviele saftatenon gozar. Va ikayolt vas « *ayik lanis do Henslow* » bas pusik kazawar. Henslow luxeon rotir taneik karavas va cugunaykafa duga ta cobekafa dizvera va tuwava, is va inafa defrera ta doskedara va bifa nutisa bumafa, is ta belcafa zoltera. Alkapaf Henslow va Darwin gu gertikafa joya dere bristupur. Batkane in va tuwava ta vangrupera va reduks ke Lorik rovyatar : antaf mukot ke opeem ke bane sare tiyir dizvera va grabom ke Lorik vols bibera.

Koyara ton erava

Darwin va reem ke tuwava skeur, tiaskon dotayer, va gozarapa albar, i va tulon gozara remi konak viel tod rotira. Belipir ise gan koyaranega ke Alexander von Humboldt (germanaf tuwavopik isu tawavopik, 1779-1859) koe Geefa Amerika is yona bwafa tursia suyon zo tclar. Nope intafa vayareka, laner da meviele vanpitir gijaf opik. Soe va koyara becon toz klokak. Do Marmaduke Ramsey nik ke Cambridge, va brinuga kal Tenerife (Canarias tursia) gestar, i kal ewala evodapasa va Humboldt.



Tan jontik rumeugalaf dotay ke Darwin : guvdokadunol.



John Stevens Henslow, vartaf tuwavopik is tavesik ke Darwin. Zovdaks gan Thomas Herbert Maguire.

Va bata koyara co djuskur abdida gu gertik xuton gu lodentafa blira va int inker. Egatason va bata stuva, platinon gan Henslow tere naler da va sidopafa tavera ke Sedgwick di tcoker nume va intafa grupera va tuwavopafa opa di tukotrar. Radimi seotara va *Bachelor of Art* dob bak taneaksat ke 1831, wetce tcicesik do in bak idulugal ke 1831 ko Wales winka dace mallakir. Kali inafa awalkera gunatar.

LAZAVA IS ORKA KE KOYARA KE *BEAGLE* TOTA

Voxen bak mil idulugal, piza tir : Ramsey nikye ton megrupen goaspil ba 31-e ke pereaksat awalker. Numen inaf azedeem atitsur. Acum ko Shrewsbury dimlakir, keson va fuxatiyara. Ba 29-e ke anyusteaksat artlakir, guzekason va fenkura va tcabanera ba 1-e ke lardeaksat koe Moer Hall. Voxen lana twa va in ker, i twa betatasa va salt ke inafa blira : va runda moe tota mallapisa anamo tamava mbi drager !

Darwin is alka

Koe Engla titi XIX-eafa decemda, dum koe cuga Europa, kristevafa alka wan tir kotindafa ise va trak gader. Opa is gaara is gaderopa is swaloteem ke selt gan alka zo gader ike zo turestar. Volale kase kontan tir folixes ok me, volse ke toka « neya » tir. Yasa ke gadikye ke Darwin tir ke unitarevafa uja (vanbliyisa koe Engla bak 1774 is rigoton gu rieta ke tanoy lorik, meusa va Tumtafa Bara is loruca ke Yesus Kristos kre torigin gu ayaf katcilik). Charles dene anglikanevafa uja soe zo ailker, tisa uja ke gadikyafa yasa, kore sin va to unitarevafa dopewa nobatad.

Remi jotugal az sardugal, Darwin koe kristevaf stravokeem zo kolavar. Inaf tavesik tid ujik koe Shrewsbury lodam Edinburgh ok Cambridge. Stravok ke opafa aneyara, icde pilkovon bliindafa opa ik bliopa ik dunolopa ik selaropa is vanblisa opa ke tuwavopa, gan ujik anton zo star. Larde Lorik va blisikeem moe Tawava reduyur, to batcoba tir miv nelkot ke redureva, pune sinafa aneyara gu febafa dizvera va loraf redunik dunolaf ok palef zo kimar. Va beta remtrakura vol roguzekad.

Acum Charles Darwin tir folixes is lanes va jadifa eva icde alka is ageltuca ke *Biblia* neva. Kore va nalera va pukeem ke ujaroti flecur ise va rieta ke jaxadas Lorik tulon me folir, pune va kristevaf nelkoteem num redureva koton yoter. Voxen koyara ke Beagle tota va inaf rieteem di kobiber.

Toza ke XIX-eafa decemda va toza ke divlizera ke toleaf britanaf gindugal tclar. Arti abica sanda, Britanafo Gindaxo va loon alubeaca ke kotaf sidayaf welmot ikwe balemeaca ke ayikeem di digir : lodatafo gindaxo meveli kruldeyeso, dem tawavo moe tadaveem.


Engla va jontika dogluyara icde divlapusa kazara do lanyona patecta volke gindaxo layeyer nume tire manton tir tela lozolonafa tamavafa gijarotiaca, sayakafa lidam skapafa. Nelke ke volmiltafa gijarotiuca ke Engla tir ilamuca moe bira. Radimi portugalik az espanik az xollandiik, britanaf toteem va sayakafa nustuca rokoaykayar, isen inafa tota va bireem ke poz moolapid.

Ta lomusafa totara, pilkovon koe lowavdafa gola, britanaf Biradrigasikeem va zolonaf bira-liwotopaf tawuk al koaskid enide krimteem is molt ke tamava di zo liwotad.

Krimta ke Geefa Amerika, pilkovon vedil noves va remlapira mal bata welfa kal bana, bam tiyid ke lorotiopafo xo : isk ke Suez narilt (turunkatan bak 1869) isu Panama (taneasteten bak 1914) vebayad da kota tota va vawa ke evilmapa dum Horn evilma ok Magalhães vedil radimi kenolapira va geefa krimta ke Geefa Amerika remlapiyid. To enwavdafa totara tiyid. Batdume lokiewafa vestara isu liwotara tiyir rigotafa gu Engla.



HMS Beagle tota lapisa (batlize drumo Galápagos tursia), trutca lingeyena gan John Chancellor.



Tokinde Charles Darwin moe tota tigiyr ?

Wali 1826 is 1830 taneafa brinuga gadena gan Philip Parker King kan toloya tota van Magalhães vedil is vema zo kabur : i kan *HMS Adventure* tota isu *HMS Beagle* dirgana gan Pringle Stokes redakik. Brinuga tir abrotcifa is portafa, Stokes redakik va antiuca ke xo tcizajar.

Miseson, ko taka va int viltar nume ba 12-e ke anyusteaksat ke 1828 xonuker. Gan WG- Skyring garveldas rikulik taneon zo ikarundar. Azen arti baroy aksat, bantan gan Robert Fitz Roy jotaf tolsanbardaf rikulik silukon zo ikarundar.

Ba dimlapira ke totatum bak 1830, liwotara ke krimteem ke geefa Patagonia me tir tenukeyena. Voxen Biradigasikeem va lintara va bata yarlafa sopura klabor numen elvucapa ke Fitz Roy buive-teson tir adrafa.

Nekev inafa klaama isu ekavama vas rikulik, va dirgara ke warzafa brinuga van geeka tere mbi odia, banviele kan antafa *Beagle* tota. Mallapira ba muvugal ke 1831 tori koyasa tolda zo abdiwir.

Ardil moe tota ke britanaf toteem tiyir zolonapaf is malaskickina. Dirgasik va solumacka tove drig (fayik lidam birelik) nope blodafi fli govideyer nume remi jijas aksateem ke brinuga oku dace tandeem loviele sostawer. To nelkafa bemuaca ke Robert Fitz Roy tiyir. In va intafa rantuca kev antiuca is vajap koaykana gan dirgara va tota grupeyer. Ksera ke Pringle Stokes dareik voxis aryonu koe inafa yasa, don tela ke tane zivaviky, suyon al tcalayad. Bemuaf gu bata rotisa konolerokeya, Robert Fitz Roy jugemeyer da kontan pokeon di tigiyr, i kontan me winugon tis ke drig is dis va grufa vwanya num grupulvimb volkare rusagafa ardilafa tikira. Nume va tuwavopik guzekayar, i va korik dere miledje rosopus va favlafa dizvera va geeamerikafa krimta num jupas va remfira ke opa.

Tan inaf pokeik di gotiyir bat yordasik. Voxen weti konaka safta abdi mallapira ke *Beagle* tota, battel fayluyur numen Fitz Roy zavzayar antaf kev etrak. I dirgasik va aneyara va artan bam gorayar ise va kon keldaskitis kotlik ovopon kaaneyayar. Titi anyusteaksat ke 1831, va pomara pu Beaufort redakik eruyur aze pu George Peacock solokseropik tu tavesik koe Cambridge is dile walasik va

ROBERT FITZ ROY



Delt va Robert Fitz Roy, lingeyen ugale in tiyir tu ikarambik.

Biradirgasikeem gu grupeikeem zo juikeyer. Bantan va toloy grupepen korik davon trakuyur : i va John Stevens Henslow tuwavopik ok Leonard Jenyns inafe veyberikye tu tuwavopaf gertik ixam vartackaf. Henslow va nalera klabur voxe va kurenik me djupuidar kire sliedje co mallapir. Jenyns drageyembon va play gan Henslow, va tuksa luseon toz askir neke vofar da va intaf gertaf flieem sliedje di gojovler nume sopron kalebgar.

Voxen firvira zo godulzar. Rotukotratason va dotay mu opa, Peacock ostik suteyer : « Drasura va mana listafa katecta co tir astirbafa tazdara kunte lazava ke tuwavafa opa ».

Henslow sonker da korik ixam ebakiraf gu sintyona viltera va int wavdon co tunuyar. Va lotiackaf tavembik bam trakur, i va Charles Darwin djukadizves va tuwava is vanpiyis nik bal sintyona abrotcifa gozara. Jenyns tu miv ozodaf bezopik is dere nik ke Darwin, va bata kiblara vanovarsar.

Batdume Darwin ba 29-e ke anyusteaksat ke 1831 va twa koton betatasa va blira kazawar : Henslow granser da in va bata merofolina dragera va mallapira wetce tuwavopik moe *Beagle* tota ta opafa koyara toldon jijatasa anamo tamava di konaler. To rietavafa debala tir, mu Darwin skeupus va wica vox jovleyes va klokara va koyara kal Tenerife ewala.

Wori ba 30-e ke anuysteaksat, dakteteson va vewara, Darwin pu Henslow is Peacock pikseson suter : « [...] Cwe va katecta necion winon firvina en co konalé. Voxen jinafe gadikye volsarson boyar kore inafa vewara me nutir belikafa, voxnumen me co tí sensaf tode me co malaskí [...] ».

Dusiva ke Robert Darwin tid frefa. Tota arti leon tanoy aksat di gomallapir, numen bata edja tir trelarsafa ta tugadiara va mallapira tori lidabrotcifa rekola ; Charles meviele al totayar, kas coba di dilizeter ede meguppen Fitz Roy is in sinton me gildutud ?; batcoba tir warzafa betara radimi jovlera va vayara nume co ronuelar ton muncafa blira ise va inafa ujangertikafa vartuca co rorotplekur.

Moi sutera va bata twa, Darwin ko Maer Hall tori fenkura va tcabanera rietarutusa mallakir. Voxe va puidera is glogakoluk pu Wedgwood yasa me ropalser, i pu pilkovon Josiah zivikye is jotafa Emma toz tunasa. Boyara ke Josiah Wedgwood tir eca dam tel ke Robert Darwin. In volson trakur da mana koyara co tir kotunafa mu Charles. Viele in tuelimar da gadikye kaliyir : « Ede va tanoy frekirik folis va favluca ke bat azed co rotrasil, pune va jinafa tirka co dimkrafíá. », pune Josiah Wedgwood pu Darwin selaropik suter, nyurnason da ban toloy korik sinton karolapad. Pu in uumuumon diver dume krupter da Charles va koyara co belundapar. Numen lana twa buiver da Robert Darwin di boyarur ise va koyara ke nazbeik di konaler voxaze dere di fukorlar.

Josiah Wedgwood va Robert Fitz Roy re gobuiver. Va in koe London taneatomon kevlakir. Bantan ke oluafa yasa tir totaredakik ke britanaf gazaf toteem, solve battan va mek tueresklas semek dadir. Ostik Fitz Roy taneon tir rodaxas : Darwin me tir kalvekaf ! Wetce godevrik ke Lavater is inafa rietava vas *Physiognomony* eva (novesa va grupera va ayik kan altoza), Fitz Roy uldiner da pez ke Darwin va kontan medis va fa adrafa gu mana koyara relmer.

Bexe mu opa, radimi abica walpulvira, bat toloy ayik va yona dofa skeura sinton kosmad. Darwin krupter da Fitz Roy tir mepes isen redakik va grupereem ke titis tuwavopik karolar. Robert Fitz Roy va rundak moe tota pu Charles Darwin tolsantoldaf winugon firvir. Kadimion cugunaykafa koyara fu dilizer.

Robert Fitz Roy ba 5-e ke pereaksat ke 1805 koe Ampton (utca varone Engla) vey oluafa yasa kobliir. Inafe gadikye tir Charles Fitz Roy jadiwik, gadikyefe veygadikye tiyir Augustus Henry Fitz Roy gri bareaf dacik ke Grafton, isen gadikya tiyir nazbeik ke taneaf levdacik ke Londonderry. In dace tir oc vas balemeafa eka ke Charles II gazik ke Engla. Numen van targafa totervolia ke Engla gan gadikeem tuwavapon zo vodjur. Ba santolda, va *Royal Naval College* bema koe Portsmouth denfir, az diretandon *Royal Navy* toteem.

Tison sanbalemnaf, ta taneafa koplaxera wetce kuranaf vayasik moe *HMS Owen Glendower* va int kototar. Van Geefa Amerika taneatomon lapir. Azon bak 1822, vanpir bodorkaf fayik moe *HMS Hind* tota lize va motazukara tukotrar, aze ba 7-e ke lardeaksat ke 1824 zo turikular. Bam moe *HMS Thetis* tota zanivar aze bak 1828 moe *HMS Ganges* tota dirgana gan Robert Waller Otway ikarambik, i gan okilaf dirgasik va varaf toteem ke Geefa Amerika.

HMS Ganges tota koe Rio de Janeiro va *Adventure* tota isu *Beagle* ta kobligara katrasir. Redakik Stokes ke *Beagle* tota su kser numen Skyring rikulik va dirgara ravaladar. Voxen Otway ikarambik va koflira va Fitz Roy gu bat play ba 15-e ke santoleaksat ke 1828 gorar. In oxam tir tolsanbardaf, wetce klaama ta dirgara va mana tota, kore banugale batcoba me tir burkarsafa. Fitz Roy nijur kiewapaf redakik tarkapan gan detikeem, is kiewaf liwotasik cobekaf is elimaf. Va vuida kotunon al kotaskir viele ba 14-e ke saneaksat ke 1830 moe *Beagle* tota ko Engla dimlapir.

Batdume va Biradirgasikeem mea djustaksas va warzafa vuida van Geefa Amerika num mea odias va dirgara va tota vidjemer. Bam va lanyona paskalera turunkar, i va pilkovon George Henry Fitz Roy nazbeik ke savsaf taneeldik ke Britana tu dacik ke Grafton.

Biradirgasikeem tere boyarur nume va dirgara va *Beagle* tota pu Robert Fitz Roy winugon odia, ta warzafa vuida van Patagonia. Ta lana koyara tere tiskitisa va alubda.

Beagle tota is bewikeem

Tota

HMS Beagle (*Her Majesty's Ship*) tir wilttotinda ke *Cherokee* pula, i gejatota ke *sloop* ord, dem 2 norisk is 10 buli. 36 mana tota wali 1808 is 1826 zo vegeduyud. Inafe abrotce tir vas 28.60 metre isen mante vas 7.20 metre, isen klite vas 242 miluntcek. Bak alubeaksat ke 1820 zo tenukeyer aze arti alubda ton gejatota gu opafa biropafa tota mantan zo artazukayar. Tanoy norisk vadimeon zo loplekur isen 4 buli zo deswad isen bolka kutum nuboketes va toloya toleodafa totama zo anamburer. Abdi warzafa mallapira bak 1831, Robert Fitz Roy va konaka tuvarasa artazukara volmiv skur ise va yona

warzafa witkapa kum inta moe azeba loplekur, numen ota ke toleodaf witkeem tcices ta biropafa sabera re tir vas alube. (Va batyona tcicesa witka keve ewava va *Beagle* tota abicviele rowit, voxen sina en kruldeyed). Darwin suter da « tota tir pinapafa ». Tota vas taneafa azeba ke yultxo is toleafa azeba ke drig is bareafa ridafa azeba ta totara ruldar. Olkobama tu liwotxo vadime vamoefa azeba tigr lize vabduf norisk remenir. Dere di tir ilpega is kobaxo ke Darwin.

Drig

Drig ba mallapira va Engla ba 27-e ke santoleaksat ke 1831, sedme Fitz Roy vas 74 bewik ruldar, ton : 17 fayik (don drigokilik is bodorkaf fayik is rentasik is tcobasik ikz-) is 48 birelik (don bodorkaf birelik is sayakik) is 9 « loplekuik ». Loplekuik jadion tir korik ilkon ganeyen gan redakik is meviunsus va totara. Vanmia sin, kle Darwin kle, voxis Augustus Earle lingsik (ikarundatan gan Conrad Martens bak 1833), is George James Stebbing doden gan miv Fitz Roy ta kiewagira va totasikieem, is Harry Fuller gedisik, is Syms Covington vanpitis tcicesik va Darwin tid. Voxisen Richard Matthews alkavuidanik tir ; va baroy amerindiik ke Patagonia vandositar : i va Jemmy Button is York Minster is Fuegia Basket, gralomeyen gan Fitz Roy bal koyara ke 1830 vox abdiplekuyumb va dimlapira ko Patagonia. Kot bewik ke batman drig efe tir zolonaf. Soesoye konak exaksunon di tid loon zolonaf mu Charles Darwin moe tota.

John Clements Wickham (1798-1864)

Taneaf rikulik tu toleaf dirgasik va totas lag apton viunsur. Kalion di vanpir pokeik ke Darwin sutetes da in tir « pelkikye ». Vanpir inaf odiaxik, pilkovon bal konak spus gemelt wal Darwin is Fitz Roy. Bak inafa misera koe Geefa Amerika, i to Wickham kodirgar aze va dirgara pu Fitz Roy puveguson dimzilir. Radimi dimlapira ke *Beagle* tota ko Engla, silukon vanpir inaf redakik ta bareafa koyara van pilkovon australiafa krimta.

Bak 1841 koe Australia va int inker lize vanpir taneaf kaatoesik ke bowere ke Moreton ceda az palsotik mali 1843. Bak 1859 ko Europa parmon dimlapir aze koe Franca koirubar lize bak 1864 di awalker. Darwin is in dun do-goleted isen Wickham titir volkredas nendasik va Darwin is inaf eveem.



Darwin va intyon gor koe tota dadiyir, don pinapawisiki tisi « dure vrebafi » is robureni gentimsabesiki.





Amerindiik ke Tierra de Fuego tursia

Bal inafa remlapira keno Tierra de Fuego tursia, zauzeteson va dubiera va tana witka, Fitz Roy va balemoy amerindiaf tursiik gralomeyer.

Sin kare goaspil ke gralomera zo yoltayad : **Jemmy Button** kire ika tanoy grujdaf tialt zo lusteyer ; **York Minster** gralomeyen poke pistok vektas vas wevala ke York Minster ; **Fuegia Basket** kire va kita bureyer ; **Boat Memory** setiketeson va vartafa dubieyena witka. Sinaf yoltack tiyid : *El'leparu* is *O'run-dell'ico* is *Yok'cushly* voxen tel ke Boat Memory zo drasuyur.

Ko Engla zo vanstayad lize Boat Memory kalion mulufteyer. Baroy artel va englafa « gaara » dodeyena gan miv Fitz Roy kazawayad : va ava is alka is blirabask ikz-. Va Englava wiluon lajuraveyed, pilkovon Jemmy Button titis tel lovartaf ke sin. Gan gazafa yasa dace zo auzayad.

Fitz Roy al vilteyer da ko Tierra de Fuego di dimstayar, satcon pokoleson va zabdura va tugriilkase alkavuidaxe. Kore Bira-dirgasikeem va warzafa biropafa brinuga taneon me djufukorlayar, pune in va intaf azed videyer ise va aroka tota dimstatasa lasulusteyer.

Viele warzafa koyara ke Beagle tota zo gruyeyer, pune va sin do Richard Matthews jotafe vuidanikye biwe tolsandafe tere rokototayar. Lag ke Matthews tiyir zabdura va taneafe tugriilkase kristevafe alkavuidaxe ke Tierra de Fuego tursia...

Philip Gidley King (1817- 1904)

Nazbeik ke Philip Parker King (savsaf dirgasik va biropafa vuida koe Patagonia), oxam tison sanbalemdaf, wetce bodorkik fayik moe Beagle tota va int kototar. Va ilpega is mosk do Darwin pakar. Toloy korik sinton tunad aze kali awalkera ke Darwin didun gunawed. King va tota koe Australia bak toleaksat ke 1836 bulur kiraze va gadikye ixam irubase koe bano boniaxomo kevlakir.

Robert McCormick (1800- 1890)

Tir tcobasik ke Beagle tota ise va yordara va winugaf tuwavopik dere viunsur, dum coba fereon tir toda moe bata totinda. Voxen boreon, Darwin, nope intyona dizvera is pomara zilina gan redakik, va in izgar. Numen McCormick va volnucapa tove Darwin di satoler. Moi mijera va Fitz Roy is Wickham, zo wagnur aze bak balemeaksat ke 1832 zo divtotar, nope winugon akolera vols enwe intafa rotubguca tove Darwin kire va inafa kobavera lasutaruteyer.

Xantazopaf vuesteks (francavon)

- **L'AUTOBIOGRAPHIE**, de Charles Darwin, Seuil, 2008 – 243 p.
- **JOURNAL DE BORD DU VOYAGE DU BEAGLE**, de Charles Darwin, précédé d' « Un Voilier nommé Désir » de Patrick Tort – Champion Classiques, 2012 – 824 p.
- **VOYAGE D'UN NATURALISTE AUTOUR DU MONDE**, de Charles Darwin, La Découverte, 2006 – 552 p.
- **CHARLES DARWIN**, de Georges Bringuier, Editions Privat, 2012 – 347 p.
- **VIDÉO : CHARLES DARWIN, LE GRAND VOYAGE**, d'Hannes Schuler et Katharina Von Flotow, Les Films du Paradoxe, 2010 – 90 min.
- **SITES INTERNET :**
<http://www.aboutdarwin.com/> [Eng] /
<http://darwin-online.org.uk> [Eng]




DARWIN

1-eafa KARBA

[1809 - 1882]

1831. Jotaf Charles Darwin, tis 22-daf, biwe tenuyus va vayarugal az inton vankolas va klepa vas tawadayaf gertik, gu *HMS Beagle* riwe xuye kototar, i gu tota mallapisa anamo tamava. Ta stuva vas loon alubda suyon betatasa va inafa envava va tamava...





RAHAN

Rahan is tacedik ke
Faltafa arna

Francafa xantofa wimbra.
Rahan et les fantômes du
Mont-Bleu (2015)

Krentasik : Jean-François
Lécureux

Zovdasik : André Chéret

Ksevasik : Chantal Chéret




Piskusik : Soleil



Kalkotavaks :


Tacedik ke Faltafa arna




Kalkotavara : Damien
Etcheverry (2023)




Zixa 3/6: Toleafa zixa koe 34^e
diréf otuk.






























Kotavaxak dem suterot



Berpot (1914)

Tre kaliapafa kalira va trelafa blikera, va int tere spikonar nume dile nonur, ton selen a swava, mea trasison va grupersena ewa. Batcoba slamar : ina itabuder, repaler, azen blayak mal nami vere artfir aze gan art zo arder nume gu balkafa skintaca divplekur, tudenawer ise va elimafa is fawokafa sugdala katrasir.

« ... Ana kumzilinikya... »

Cu bene inaf kutceem tere tir gamiafu, numen ina va baerdafa ewa vion is kuncanon toz tiyar ; voxe va kota speda ke praka wal gelteem dure wan fargier, numen kota askira va firvira va Ave blikera van aludevaf kelt stakser, liz kavakirafa Ketya moe uskej arse xowar, terektason va lexa ke ticstis blikereem is malsetikeson va an kalaf mielcek.

« ... Lorik do rin tigrir... »

Nuk ke istayaxa va ebeltafa obla moe batacaf sid dem zwafi afi nedid ; ulim ke cirdata awickis bene dom ke orikafa aala nutid yup ke blisik co kostin gan fent ke tawa num xonukesin ; voxen fentunaf miel tir fawokaf lodam eaftaf.

— Golde manyona kelda, artan sielon deneon gonozavzagitid, ~ Chapdelaine gadikya kalir. ~ Neken, mecoba tir listafa loon dam miamielafa mista koe Saint-Cœur-de-Marie uja, do Yvonne Boilly tareskouse is Pacifique Simard listapon latinavon gidankuse !

Wegayer nume va mecoba nunuvelasa temara ok culimera kalir, ba man miel, voxen inyona ewa is puda va sinafa ileuca isu antiuca nekevon dabored.

Kurenikye va inafa batcera diepiler, ise dere gan zarduca ke baerdaf siel zo vanolar, nume va int toz buntur.

— Ae arse, Laura, va loon kalafa blira do artan co tiskiyil, i do ayikye co zavzagiyyise moe kon tawayany poke widacka.

— *Volguy*, Samuel ; Lorik askinyir va intafa kotcoba. Arubá... Tire arubá. Toktan me gilarubar ? Voxen me al tit volkalaf, meviele, rin is jin ; urdanson al blit ; nazbeye tid rumeikany, laspedaf is lewe kalzilis va waks, isen Maria dere tir nazbeyanya...

Sin toloy setikeson va darekeugal zo tsedad, is trakuson va tsoka ixam anteyawesa is dank sure titstitis is kotlize kotgrupes va koblira ke Giwasik. Blira dure al tiyir tanniafa is opelafa tove sin : olgafa adrafa kobara, is seylucanya wal kurenikeem, is gruidera gu mweem ke tuwava is alka. Kota batcoba ko mil remay, va int al dojer, i migeem ke atay is pinteem ke vieleafa kruldera, kotcoba belcon tronkanafa inde va intafa stasa alkafa ilamsiskera gu memuxana krenuguca me co rosolparsad.

Sedme kot rumeik, Jesus Nazareth sotir « Jesus velye », i rumeik kendakiraf ke jontika lorbafa ewava ; isen ae sedme dere gadikeem, inaf yolt to va batcoba loviele kaatoer. Me va kranavaf is koekaf Krist ke protestanteva, vols loyastaf is legijaf korik : i pintik koe meem ke inafa gadikya, ok icle velik rorenan swavasugamon is metrakuson va inafa direfa wetara.

— Kas zo djukovdal ?

— *Guey.*

Ine mo badeeem va rumeya narir aze va int abduuradimon toz sespar.

— Kas dere fu dankagat ?

— *Guey.*

— Kiewaxe ; do jin dankagal !!

*Koe jinafe jaftolxe,
Jesus tir mempepes !
Tir neciaf
Bak tuomara...*

Ine mebesatason va inafa tiguafa puda, pudomason toz dankar ; voxen zarduca fure wackar numen ine cugeke dankagar, ton iteem ilon. Télesphore pokon debanyar aze sonteson disuker. Sedme batyon rumeik gaan koe antiafa mona, do gadikeem wetce antaf dositik, Samuel Chapdelaine va kotafa proyuca ke tamava isu gijarotiuca viwazer, ise larde do sin sotir zijnaf is keaf is djupronaris mo badeeem is puon djuprodankagas va dankot ik data ixakafa danka ke lekeugal taveson va bata kotcoba, pune nazbeikeem va ine manon vadulon renar.

*... Kota berma ke gazik
Gu yona listaca
Koe bae jaftolxe
Vol zo doluned.*

— Ware ? Batcoba kiewafa ?

Re Chapdelaine gadikya is Tit'Bé dere dankagad. Maria va intyona blikera konakvulon vol lanonur nume disuker ise terektar ; voxen eweem ke dankot va inafa bitavuca jontolar nume kan folixa loon lujafa va lag gin askir. « Va rin kiavá, Maria, kavakirafa... »

— Azen re ? Va ara danka : va toka ? ~ Mekeson va dulzera, ine toz dankagar :

*Baroya totapa al artlapid,
Kotrafa gu granca, gu denta,
Mo lava gozatat,
Ko ewala vefatat...*

— Volgue, me bata... Va Aftaf Sul ? Ax ! Bana listafa ! Volant kotote fu dankagat.

Va Maria itar ; voxe wison va praka dun fargiena wal inaf gelteem, vol govenonur.

*Koe aftar sul
Gozason al trasí
Va karapafa lava
Eke va int al kolavá...*

*Jontikedje va rin rená
Va rin somevulkutú...*

Evluba is eweem mileke kontes ; tsurk kotraf gu ixakafa gabentuca, ant opelafa takra gan mana danka zo rotukrenugar.

*... Moe ticefa gama,
Percanya dankayar.
Dankal, perca, dankal,
Itupafa takra...*

*Jontikedje va rin rená
Va rin somevulkutú...*

Speda ke praka wale sotcen gelteem mea zo fargied. Maria do ban sin me dankagar ; neke terektar, numen latema dem kexafa rena nuvelar kontesa is zijnafa van inafa takra argamana gu blikera.

*... Rinafa takra djukiper,
Voxen jinafa djuborer
Va renanik al vulkú
Kire al pulvijí...
Golde konaka raltada
Jinon vewayana.*

*Jontikedje va rin rená
Va rin somevulkutú...*

Maria va batakap tayeem iste fawokafa aala rem dilk disuker ; alkafa zarduca, is laumara ke inafa sardafa rena, is kontes mam ke yastaf pudeem ko intafa takra ton antafa kontega aotcewed. Ae, tamava resielon tir kotrackafa gu tirbafa rena is baerdafa rena, i gu kota rena mileke opelafa is pofa guzekana gu adrafa tuwavaca ; kota tir aotcewesa maninde blikera rozasa va rubuca ke lorik tove abegik anton tir mergil ta exaksara va ayafa rena, isen laspedafa renafa latema kan skulbafa is fawokafa puda is wendesa tiva ke kaikayafa korozara zo dankagad.

*... Co djumé da raltada
Co wan tir bene ralta
Isen dace ralta
Co zo mimar.
Jontikedje va rin rená
Va rin somevulkutú...*

« Va rin kiavá, Maria, kavakirafa... »

Moi danka, warzon zardon, Maria va blikera balkon kalidar, numen gire Ave blikera zo negad.

Alma-Rose rumeya, modesa moe badeeem ke gadikye, zo basvager aze ko ilava zo burer ; Télesphore azon lanir ; fure Tit'bé va int silukon divimpar aze va kusafa inta ke cirdata kobendingar ; Chapdelaine gadikye ko jaftolxe ironokon lanir aze dimvulter, kalison da fent laumar. Kot sin koe ilava ixam tigid, vaxe Maria.

— Va artgumara me vulkutul !!

— Guey, gadye.

Ina waroldon artgumar, abdualbason va izga, aze pok dilk gin debanyar aze va ironokafa Ave blikera negar. Moion, wegayemer ise kivar da va ota rotir al roklar, kiren va speda ke praka konakviele me al patar. Va mon alub-sanoya blikera xeyon ware negar aze bam azavzar, spikonana is legafa nek kalafa is odiakapafa, dumedede va fawokaf abdiplekuks co su kazawar.

Diveon tamava tir afikirafa, vonena gu fentafa wafuca mielon gibesasa moe noldafa gola viele kelt tir aftaf ise tael jeber. Koak ke mona tir tapedaf isen tawaday is aala tori an baerdaf bartiv nutuafiawed.

« Decemoya Ave blikera tid kaliyina, ~ Maria trakur, ~ voxen va tarja men al erú... me kan ewa. »

Sedme ina, batcoba rotir me titir adrafa ; me tazukoyembon va fuxa ke inaf kutceem, lorik gildatar, moekote Maria... tiyisa ayikya moe bata tawava. Voxen tere, inafa opelafa takra va kivara envar, numen va intafa erura kan ewa lamuxar.

François Paradis... Efe inafa djumera vas François Paradis kapburedar. Al diepilec. Pu Maria kavakirafa ? Va toka intyona jugemera ina metirbuson roslemar ? Da in va argepe koe aala me xaker ? Da va abdiplekura gotarkar nume va vogadara is ulira godivgir... Da ba imwugal dimlapitir...

Da ba imwugal dimlapitir... Ina batlize tenur, kire trakur da kaiki inafa dimlapira, tarkayason va abdiplekura, sinafa direfa kaluca titir koncoba kotaskitina gan riwe ant sin... riwe ant sin... Vaxede mana trakura co tir felkomara...

Da ba imwugal dimlapitir... Modovason va bata dimlapira, va in, va inafa listafa gexata anteyana gan awalt xowatasa van int, Maria va kotaf arak vulkur, ise va sid besayan gu nolda vox tuoltavan gu pozlapa ke kona galovafa dorora, i gu nolda vas grujda ok wula, gan taelafi, is va ebeltafa istayaxa, is va pokef dom ke crakefa aala jontikedje mewison disuker.

X

Ilanaviel va auzusik me vanstar. Levi siel, Chapdelaine gadikya awuzamana va kexuca lev tiva vas ilamaykana itupuca palser.

— Kore metel fu sielur, ~ kalir, ~ volto batdume fu urdat. Va zietexa fu eput.



Rumeik daavon kizoyud ise va egara ton skeusa dulapera kakdisuked. Botacuizda is blakerafa bota zo aotced aze koburmed ; viele burmera umeke tir, pune Télesphore va vopelaf azekolap kotraf gu batakafa noldanya divuon koburer. Kottan anam azega va int belcar, edje Chapdelaine gadikya va trotasa cuizda mo nolda sotre belaxa lubesir, lize ina ton botakiraf bediblaiks fron fentaf darpeon nyebawer.

Kottan silukon mbi zanolur, ton milgik mempeson milaskis va delfajafa peguca ke rumeikeem ; voxen walmunera fure zo tenur, proyon, ta emuderanya va ageltafa zietexa is epura oxam bokana. Kiren burmera zo gotukotunar aze ba gadiuca zom remi tuolgawera zo gostokeper. Sudaf nubapeem ke Chapdelaine gadikya bak aluboya wexa va frafa weridja dure tuabrotcana azu soana nubar ; inafa lizira adre zo tuviar, azen zom pwerton gu gelt bocatomon zo divimpar aze kan iwota zo gaber, sugapanon kire ixam tir olgaf. Zietexa tir epuyuna.

Rumeik va yon taneaf lip ixam roxanad viele tuvel gu vordava zo dendar.

— Eutrope Gagnon, ~ gadikye kalir. ~ Efe trakuyú da zo gevatá kase revielon ine do cin me co sielur.

To Eutrope Gagnon tir, en. Kolanir, va kottel sielkiavar, va myotedji mo azega aykar... Maria va ine disuker, ton keraca bene tcoreem. Orpa sokuranir da ba ilanaviel yikye va yasikya tcorkutcar, isen Maria grupecker da Eutrope, kore tir vazafe, va bata favaca fu maldiner ; ina poka azega mearganon zavzar mezekasa, voxe va banara kutcara co djukazawana trakur.

Neken miltel va firvina rova narir aze itomason debanyar.

— Til antaf auzusik va cin revielon, ~ Chapdelaine gadikye kalir. ~ Voxen tce va metan dere al wil... Laneyé da do cin di sielul.

— Efe... Va ilanaviel tiskiyin mesieluson me co iskeyé. Voxe ostik va lan warzot djukalin pu win gí.

— Ax !

Golde erusa kaikdisukera van int, wan itomar.

— Wison va rinafa gexata, guzeká da bat warzot tir volfalaf.

— *Guey.*

Chapdelaine gadikya mialon ranyar, vudazatcason.

— Kas to nazbeye co tid ?

— Volgue, Chapdelaine weltikya. Esdras is Da'Bé vickid, ede Lorik kuranir. Warzot jinon pulvin me tir ke bat ind ; volto vuwik tir, voxen to yikye winon grupene. Ine klabumur aze va yolt omapudason tiyar :

— François Paradis...

Van Maria tanvulon itamadar aze arliz vere disuker ; voxen ina va bata itara dem teldafa luntuca dace me katcalar. Amlitarapa osk mo mona voxosk mo varafe tame su luber ; kot blisik isu blixá stivawed ise va bat warzot wesidon ked, i va warzot eafton zolonaf kir tikis vas ane ayikye enkrafiane.



Maria Chapdelaine, ke Louis Hémon (8^{-eafa} zixa ; wana tigisa koe yon daref otuk)

Maria Chapdelaine : berpot (1914) ke Louis Hémon francaf suterotik
 Xanto : Maria Chapdelaine francavon, kalkotavayano gan Staren Fetcey, 2018.
 Dotay : Kotavaxak dem Suterot.

Robelin banliz : <https://www.calameo.com/books/007735347a70b2f8fd0f4>



WAGEYEDAF VAYNA

☀ **Va bata sutkafa wageyedafa vayna kosmal, i vayna kotunafa ta divepatectaf is fozaf eftol. ♥**

VWA

Fakapafa

XANTA

Taia

EGARA

15
wexa

BURMERA

20
wexa

TADLE

Sotre balemoy korik :

- 5 ato + 1 atoxa
- Wageyeda vas 25 cl-
- Vrod vas 25 cl-
- Spunteyene wageye vas 4 foriacekam
- Botagoa vas 50 g-
- Liarcadkirafa bota vas 1 eyeltcekam

FOMEK

1. Va atoeem is bota koe keresta kan usta aotcel.
2. Va vrod is wageyeda koe milka lembiel.
3. Va vrod is wageyeda ko keresta kalgimal. Va egaks ko sarmama gimal. Va sarmama kan *bain-marie* ckane remi 20 wexa vas 6 DY- (180°) kocadel.
4. Divplekuson gu cade, va kota sarma gu wageyegoa vas 1 foriacekam goavel. Va tufentawera remi tanoy bartiv koe gael iskel aze ko tufentasiko rundal vieli zanolet.



NATELAF VAYNA

☀ **Sutkaf jewes is vaynakoraf eftol dem moavayafa is jebesa natela moe welma. ♥**

VWA

Fakapafa

XANTA

Franca

EGARA

15
wexa

BURMERA

25
wexa

TADLE

Sotre tevoy korik :

- 5 ato
- Vrod vas 50 cl-
- Botagoa vas 200 g-
- 1 biolmabianu

FOMEK

1. Va botagoa vas 100 g- ko milka gimal aze va lava vas 5 ml- lopekul. Tuidulal vieli va natela seotal.
2. Va natela mo ludev ke cadeatolupak ok sarmama kalgimal.
3. Va arak ke bota do atoeem koe colubak kan usta aotcel. Va vrod do ludzeyenu biolmabianu lembiel aze voldo biolmabianu mo ato vaon kalgimal. Aotcel.
4. Va egaks ko cupa kalgimal aze kan *bain-marie* ckane remi 25 wexa vas 6 DY- (180°) kocadel.
5. Va tufentawera iskel aze abdi zanolera bascupal.

TELIZ

2^e bu : Sara sersya (1/2).
26^e bu : Krafolma ke Roma.
30^e bu : Darwin (3/6).
54^e bu : Rahan, Tacedik ke faltafa arna (3/6).
64^e bu : Maria Chapdelaine,
berpot (8/12).
70^e bu : 2 fomek.
72^e bu : Kuda ke Aisopos.

Kotavusa virda

Virda kotavon sanelayana, nuyon is faston romalvajana is rorubiana is rotanamzilina. Ickriluyun rokeem. PAG / DE.
Internetxo : www.europalingua.eu/KotavusaVirda
Bu : www.europalingua.eu/KotavusaVirda/33-e_otuk_07-2025

Sanegara : Pereaksat ke 2025. 33^e otuk.

Yunkexa is ewava : ewaveem abugaf gu roka ok nuyon rotamuzen ok rictayan gan digisik.

LIWOMBURA

Tula va olkoy ke lan liwatum watson gu alto.
Konaka gokosmana peryasafa liwomba.
Xantaza : <https://kotava1837481.wordpress.com/2018/08/26/7-familles-en-kotava/>

2

Loma
AROTIEVIK

NUYUCA



Louise Michel
(1830-1905)

Louise Michel tir naz-beik ke zanisikya ke widalamone. Lajuvanpir tavesik aze va ayikyevaf rokeem is gaderopafa nuyuca toz sayudar ise suter. Bak 1870/1871 tir korobapik ke « **Com-mune de Paris** » arto-warugal. Moi inafa selura, zo soper aze ko xalta ke Nouméa koe Kanaka zo rezgaler lize lewe sandon zavzagir. Va kanakafa araya dulapenyer. Azon kali awalkera bak 1905, va gaderopafa arotieva wan zanudar ise mu dodelikeem dun exaksar. Konakviele zo koflantar.



Gracchus Babeuf - Louise Michel - Louis Lingg -
Nestor Maxno - Sacco is Vanzetti - Buenaventura Durruti

Okol is astol

Ayik va okol is astol digiyir. Lanvielon sin koyad. Moe kelda, astol pu okol kalir : « Va vajki ke jin naril, ede va jinafi bli lotil. » Okol oblakabuder, aze astol, cuerses, luber aze awalker. Bam feliik va kotcoba mo okol vajar, is va dace astolalma. Kle okol repaleson kalir : « Ax ! tí mefalaf ; mancoba ben jin batinde al sokir, kax ! Lecen va pornam me al djuvajá, kle re burersé, va kotcoba don dace alma. ».

Bata kuda nedir da, ede gijik va pinik vangluyar, pune sin va bli soravaldad.

Kuda ke Aisopos, -VI-eafa decemda
(kalkotavaks gan Yurani Andergan)